

DÍDZA'DO' BUNNI BUZÚAJĚ' JUAN

Le naca tsahui' runë' bönni' lë' Gayo

1 ¹ Neda', bönni' gula run chi'a bönachi queë' Cristo, rugapa' Dios li', Gayo dxi'i ladxi'. Nadxí'ida' li' tu' núnbë'ëru' le naca idútë li. ² Bócha'ado', rinábida'-në' Dios gunë' ga gaca dxi'a quiu' lu yúgu'të le runu', en su' ca' dxi'a, ca na' raca dxi'a que bö' naca cazu'. ³ Rudzējada' tu' ta'dxinë' yugu' bóchi'ru' ga zoa', en tunë' ba nalí quiu', ta'nnë' nacu' li ladxi', en runu' ca naca le naca idútë li. ⁴ Biti' bi dë le runrö ga rudzējada' ca lë ni, riyönda' tun nupa náacagaca ca bi'i que caza' ca rnna le naca idútë li. ⁵ Bócha'ado', runu' le naca tsahui', rácalenu' bóchi'ru', en runu' ca' le nácarö lesaca', rácalenu' bóchi'ru' biti' núnbe'enu' légaquië'. ⁶ Yugu' bóchi'ru' ni tunë' ba nalí quiu' lógaca bönachi queë' Cristo ni, ta'guíxjö'ë ca na' nadxí'inu' légaquië'. Runu' le naca dxi'a, rugú'u légaquië' nöza, en rácalenu' légaquië' ca na' sa'yéaj gunu' quégaca nupa tun xichinë' Dios, para ulu'ú'ë nöza. ⁷ Légaquië' bila'rúajë' ni tu' nadxí'igaquië' Jesús, en biti' bi ta'zi'ë lu ná'agaca bönachi biti' ta'dá' Cristo. ⁸ Que lë ni na' ral-la' gunru' bal bönachi tun caní, para gúnlenru' légaquië' dxin que le naca idútë li.

Le cabí naca tsahui' runë' Diótrefes

⁹ Chibuzúaja' lu guichi le uzéajni'i bönachi queë' Cristo ni', pero Diótrefes, bönni' ni' raza ládxë'ë gáquië' lo ládjagaquië', biti' runë' netu' bal. ¹⁰ Que lë ni na', channö huida' ga zóali', usá'a ládxi'li' cate' udúbili' ca náacagaca le runë'. Rizí' quídzë'ë netu', en rnnë' queëtu' le cabí nácatë. Biti' rizxón ládxë'ë tsa lë nisö, pero lësca' biti' runë' bal bóchi'ru' ta'dxinë' ni', ate' ruzáguë'ë xinózzguequi nupa ni' té'ëni ilún légaquië' bal, en rubéajë' nupa na' ladaj bönachi queë' Cristo. ¹¹ Bócha'ado', biti' gunu' ca tun nupa tua' dö', pero ca tun nupa tun le naca tsahui' gunu'. Nu run le naca tsahui' nequi queë' Dios, pero nu ruá' dö' catu caz benbë' Dios.

Le naca tsahui' runë' Demetrio

¹² Yúgu'të bóchi'ru' tunë' ba nalí queë' Demetrio, ate' naca bë' runë' le naca idútë li. Lësca' netu' runtu' ba nalí queë', ate' nózili' nácatë lë ni runtu' ba nalí queë'.

Le rinabë' Juan lahuë' Dios

¹³ Ziánrö ca' le gú'unida' uzúaja' quiu' lu guichi, pero biti' ré'ënda' uzúaja' le lu guíchisö. ¹⁴ Na'a, runa' löza ilé'eteda' li', ate' güí'iru' didza' ruá'a cuinru'.

¹⁵ Rinábida'-në' Dios gunë' ga soa dxi icja ládxi'do'o. Nupa ni ta'dxí'i rë'u tu'gapa Dios li'. Lësca' li', bugapa Dios tu tu nupa ni' ta'dxí'i rë'u. iCa' gaca!